

七言古詩
五言律詩

谿谷集

第十二



谿谷先生集卷之二十六

七言古詩

四十七首

贈清陰公

清陰學士珪璋姿明堂清廟乃其宜委擲埋沒亦
奚悲虹光扈煌終自竒嶽麓閉戶經幾時寒筠霜
菊相因依窮愁遣佚天所資斯文蕪穢須公治康
回憑怒圯坤維鴻流蕩滴漫赫曦隻手繇力欲何
為徒然戚嗟涕交頤此心炯炯質神祇不平之鳴
大聲希春容宣洩以自娛包羅風雅靡所遺參以
南楚悲哀詞郢中白雪邈難追吾儕妄擬相埒麇

世莫我知吾道衰一室之內樂在茲古來利鈍已
可知賢聖失時逢百罹日入地中為明夷鳳鳥不
至傷仲尼文章每苦命多謫搜抉造化神不釐長
沙才子吊湘纍韓蘇李杜足釁訾嶺海萬死命如
絲往往不免寒且飢公雖不遇比於伊差可自適
那怨咨萬事有命更何疑蟲臂鼠肝任鑪錘人生
晚節誠難期守玄清淨終磷緇願公努力謹遜危
斯世望公公敢辭俚語贈公不成詩雷門布鼓寧
非癡公若肯教吾請師

入峽

滔滔孟夏草木長促裝策馬遊峽中峽中山水可
淹留巖洞窈窕多青楓松花療飢木苗肥琳宮紺
宇探幽竒從此無人識我處東將入海尋安期

同樞申公慶壽宴賀詩

有序見文稿

浮世流光促飛電誰能坐閱桑田變南極老人自
有星肯向木公勤乞靈我公天與神仙骨平生不
屑金丹訣行年九十有三歲秀眉紅顏映華髮高
堂壽席集公孤玉酒麟脯禱頌俱白鬚郎君扶几
杖異事流傳堪畫圖能將一身備五福實與盛世
光壽域三雍割牲雖未遑煌煌金帶蒙殊錫靈椿

萬世為一期公今大耋猶嬰兒更待三萬六千日
為公重賦慶壽詩

清陰公以緗牋四十幅見餉詩以謝之

老穀生枝累妍皮苦磔擁腫中流脂良工取之作
側理凝光鍊質真相宜淨如東絹滑如玉中央正
色含殊姿蔡倫薛濤骨已朽此物猗猗天下奇清
陰丈人為贈余入手四十黃碑礫却思昔年直金
鑾彩管雲牋供特書邇來屏居飽窮愁日夕閉戶
箋虫魚家貧不能給筆札敗縑故紙恒無餘感公
此餉意何極令我几案生顏色毛君墨生德不孤

詩律文心頓增格但作解嘲慰落拓不向公車草
奏牘章成手寫寄石室請公細和不厭復

再贈用前韻

道人生事一烏皮不學曲士工韋脂文章例得窮
愁力殆是天公借便宜恠公如許鐵石腸吐出綺
語饒妍姿玉署蓬門兩無累丈夫雅負胸中奇末
路敷腴喜得余波斯老賈識碑礫逢迎幾下孺子
榻尉薦欲上文舉書昨將拙語謝珍貺遂枉妙作
兼雙魚頓令鄙屋得奇寶懷璧是懼那願餘萬化
浮沉任回極欲問蒼蒼非正色薄俗難逢好心事

高人不改舊風格儻來誰能傲軒冕寒淺只解重
竿牘多言數窮還自笑懿戒主玷須三復

桃菊華牋歌奉謝清陰公見貺

君不見武陵仙村萬樹花春來處處蒸紅霞又不
見淵明掇英東籬邊霜天爛熳黃金錢仙風逸韻
兩超絕長與騷人作口實會稽先生姑射姿天然
皎潔冰雪肌平生雅慕換骨法慣尋靈源訪醉石
餐英咀華浹肌髓一朝幻出新面目絕代佳人醉
顏酡西方大聖渾金色詩仙上天藝苑空獨立濁
世甘棄擲清陰學士真知己紹來投嘿所子嘿

所子忽逢君雙開青眼敷腴喜薰之以博山沉水
之清烟薦之以明窓文槩之淨几試拂栗尾彩花
開為點隄麝紫光起日月風雲入藻續名山石室
生光恠與君終始託心曲任他俗子嘲玄白

維之南來畸庵子以長句贈行途中次韻酬
寄

我生東夷苦迫隘井蛙不識乾坤大一片肝膽抱
磊砢半世身名任坎坷放逐誰憐楚澤醒孤貞欲
學西山餓門前蓬蒿深没人長夏身閑只高卧谷
口老子好心事知我如君有幾箇平生自任斯文

重獨峯索驄千鈞馱晚得一第仍落拓橫逆幾遭
當面唾逆旅抱疾誰藉在時寄佳篇要我和窮途
何幸得強伴意氣堂堂賴不挫世間離合苦不常
我去君留兩無奈出門日覺故人遠愛助誰能警
昏惰把君贈詩置懷袖百遍讀來紙欲破何時肯
踐鷄黍約為君洒埽虛上座榮枯倚伏應自知塞
馬失得休吊賀

早霜

丙辰八月十二日夜來嚴霜白如雪晚稻未熟豆
結子可憐百穀皆夭闕田翁拊膺涕淚垂去年不

飽今年飢縣官只愁歲入少增租括田無已時

方丈山歌送帶方高使君

用厚

三韓之外方丈山六鰲不動高巔屹白頭南流窮
海際秀氣橫蟠天地間洞天福地往往在仙曹龍
象相盤桓青鶴高栖在何許俗客欲尋神鬼慳孤
雲一去已千春隴西公子曾迷津送君却向此中
去瀛州風露猶在身萬壑烟霞生脚底羣仙乞與
雙颿輪秘訣隱文細紬繹瑤臺絳闕為比鄰永嘉
蠟屐豈足道勾漏丹砂苦不早知君不用賦歸來
靈區物色供幽討石髓莫遣風吹堅青精解使顏

色好倘憐故人在塵土須分一束金光草

次韻訓張生希稷贈歌

吾宗後生有儁士驥子墮地無凡步不用著論怨
潛夫行潦之水堪挹注少年嗜好獨殊衆酷耽簡
策絕外慕冲天自可奮六翮增價何煩要一顧世
間兒子苦紛紛雅操英姿兩難具文章況是我家
事爾更蘄然頭角露嗟吾未脫文字障宿習纏繞
成癖痼謬將薄技浣禁闥擬報主恩歸農圃九
關深深足虎豹青娥組紱工讒慝居然遂作澤畔
人舊迹茫茫隔烟霧窮鄉稍足慰離索與爾鄰居

愜情素藏書千卷盡攜來丹鉛點勘窮朝暮我唱
君和互相屬滿腹璀璨珠璣吐窮通自是有主張
吹萬不同誰所怒漁翁田叟好往還藥圃桑陰課
晴雨寒食清明看又過山花野艷開無數且可眼
前取娛樂何須身外論遭遇村醪雖薄也堪斟
磊須煩洗心腑醉君酒聽君歌眼底俗物如蚊聚
攜君直上望海峯共看滄溟片颿渡

次韻贈張生希益

嘿所居士可笑人平生蹇拙無寸技論材却慚隴
底松取實真同道傍李中年失計業詩書謬得虛

名動遠邇朝廷不棄管蒯微屬藉出入周衛裏金
鑾手握赤管筆秘錄不許人人視無何失脚墮青
冥弊衣瘦馬來海涘斤鹵茫茫瘴霧昏數村烟火
漁商市埋聲閉影類藏逃野老誰知舊太史比鄰
幸得二三子求仲羊仲君今是同宗况復古所敦
晨夕正好通薪水京華舊交豈不多失意皆同路
人耳此地逢君喜有餘空谷足音那可比通藩撤
籬作一家壇理何須限彼此東風驅雨夜來顛小
屋卧穩朝慵起山花村柳覺媚嫵斗酒早判邀鄰
里紛紛榮落豈足道世間萬事無窮已歸田大勝

作官時灌畦種木從今始

翁刈稻

翁刈稻稻未熟婦舂稻稻帶濕吏來索租聲如虎
傾盞欲與吏轉怒請吏且住何怒為伏雌可烹黍
可炊吏詬而去首不回明朝定有追符來

張希稷有小疾戲贈長句

西鄰張生本清羸忍飢讀書聲吾伊秋來霜露忽
相侵數日不見令我思四大假合寓火宅生老病死
紛相隨至人視身如虛空何物能病虛空為吾
儕疲蕭真可憐嘔出心血惟耽詩不如拋却學無

生此生庶有休歇時
臞頰居士閉丈室宿命定自
毗耶離一言為君已膏肓可能杖藜來聽之

北邙行 效張王

北邙山下連坡陀
纍纍滿目丘墳多
新墳崔嵬故墳頽
日日但見喪車來
喪車來入山曲路上人歌
山上哭紅旄粉字高十尺
白骨誰復知
榮辱墳前無地種
白楊斷蓬宿草沾晨霜
狐狸晝眠石床上
見人走入深叢藏
高臺歌舞春風闌
千金難買九轉丹
人生浪作百年計
北邙山前水東逝

曉行

曉月蒼茫挂山頭東方漸白風颼颼板橋霜重馬
蹄滑橋下深溪凝不流行子貪程水滿髯十月寒
透木綿裘誰家煖閣繡被重醉夢不省催曉籌

送守夢鄭先生之任襄陽

儒林丈人誰復有守夢先生未白首先生滿腹貯
經術絕學擬紹諸儒後清朝屬望向來重八座自
是鄰台斗豈無一片著公地却遣嶺外紆墨綬餘
人咄嗟公獨笑外內未可論薄厚况公堂上有壽
母家食不易充昔滌專城榮養古所重五鼎之饋
百金壽嶠東謠俗最淳古卧治定不煩鞭扭習池

風流仍可踐峴首嘉名良不偶優游六考樂有餘
不羨簪紳趨卯酉乾坤納納難容身世事悠悠休
挂口坐看前輩半飄零不是江潭即畎畝玄翁蕉
萃沙老病更有何人免陽九如公福德誰得比任
是無譽却無咎此行何異便登仙天實寵公公知
否先人遺愛在此土二十年前曾出守送公不覺
淚潛然獻詩一篇頭再叩

雷轟轟轟

戊子十一月二十二日大風雨雷電

雷轟轟兩滂滂仲冬之月見電光天門開闔誰主
張北斗七星錯低昂龍蛇起陸海波揚蟄虫不得

安其藏帝傍玉女亂紀網豐隆屏翳橫莫當四時
反覆日月荒墻傾屋摧萬民忙書生何與憂陰陽
脫粟在案不敢嘗閉戶不語淚沾裳

十一月晦日夢見月汀先生

寒齋寂歷清夜徂擁褐熟寐遊虛無月汀先生忽
入夢蕭然古貌溫而臞陳列圖書薦毫牘意象不
與平生殊諸公在前相討論語雖不記饒懽娛歟
然驚覺失幻境起坐清淚沾髭鬚先生風化已踰
年定與列真遊清都下土門生似蟣虱精靈降臨
牖昏愚亦憐小子服餘訓身雖阨窮心不渝濁世

卷之三十六
焚焚轉迫隘斯文喪矣誰能蘇不知造物冥冥裏
若為簸弄機與樞先生今在九天上亦頗念及斯
世乎餘生處世欲何為獨保方寸捐憂虞

夜坐放言

目眚不堪對燈檠閉眼默坐存黃庭兀然非醉亦
非醒冲融澹漠中惺惺萬籟過耳不入聽神遊物
初交混冥不知我身是誰形聞昔軒轅謁廣成遂
傳秘訣發道精慎內閉外物莫撓守一處和衛生
經竺乾先生譚無生併超空色全心靈迫離生滅
脫天刑二家末分本則并摠以靜定為榦楨我淪

濁世染葷腥謬攻文墨竊虛聲形神騷動羸疾嬰
幸為世棄返柴荆歸依道妙瘳狂醒直契真如遣
妄情兼守玄牝制頽齡縱未飛昇朝玉京比之火
宅差清冷藜羹豆飯折脚鐺蒲團一座無人爭此
中無辱亦無榮冥冥風雨暗秦城回頭不顧公與
卿

送白沙李相公赴謫

先生兩朝老位極三事尊可無拚一死早荅明
主恩漢老入地完老謫先生不言難塞責足見
先朝得人盛二三舊臣寸心赤三江七澤好亭臺

飄如羽化登蓬萊

嘗聞先生戲語欲以飄飄如遺世獨立羽化而登仙名東岡新

亭置之此中飽清閑造物小兒無乃猜故令斥逐

落遼荒邊風朔雪愁奔忙非無別淚可沾巾恐有

田生能笑人

大雪次舍弟韻

今年寒早陰氣盛南至以前三大雪乍看雲物亂
崩騰稍聽風林響騷屑須臾飄灑蔽天衢開戶縱
目真奇絕歟如天地欲混沌溟海飛翻鰲極折屏
翳玄冥正王張陽烏縮頸愁凜冽大地山河幻形
質堆瓊疊玉巧施設徑思驢背去乘興鶴氅生寒

銀海纈閑齋擁榻作吳詠白戰何人屏寸鐵豆粥飽來百無思卧聽簷雷鳴淅淅

舍弟以金陵道上作見示漫爾次韻

詩翁琢句不知老行吟驢背荒山道每道此趣少人知君却稍解無乃早去歲移家住海濱幽居寂寂誰與鄰自從君來樂有餘埤篇迭唱何紛續又見金陵道上作物色渾如我曾到喜君詩律漸清新不妨老兄仍潦倒天公自是老眼迷長遣騷人飢欲啼草屋蓬門了生涯腰未嘗折頭不低西家張生幸接宇日夕沉吟對江浦徑須呼取共論詩

披褐攜筇行雪塢

苦寒行

去年苦寒近臘天今年苦寒冬至前
長河怒濤如銀屋一夜層冰千尺連
乾坤慘慘白日昏龍蛇蟄藏難自存
共道幽朔殺氣盛天驕陸梁干時令
不然朝廷政化錯羣陰擁塞微陽伏
吾儕小人都不知閉戶孤吟冰滿髭
地爐無焰布被冷凜風日夕搜茅茨
忽憶長安豪貴家恩光浩蕩春無涯
狐裘獸炭醉耳熱不怕人間有霜雪
人間霜雪獨侵人可憐書生多苦辛
不辭一身受寒苦何時萬物見

陽春陽春若復到窮谷紇千山頭無凍雀

長星行

煌煌長星長百丈出自東極亘天維
彗耶孛耶欃槍耶人言乃是蚩尤旗
蚩尤死已一萬年豈有精神猶在天
揚鎧掉旗作氣勢美天之兵竊天權
竊天權天何為乾坤流血海嶽移星官
狂走長老泣百年所無今見之聞昔軒
轅戰涿鹿指南一試禽鐵額上帝聰明
過軒后日月照燭風霆走風后力牧在
帝傍下招不煩遣巫陽赫然天誅孰敢
當一掃妖孽摧凶芒三階底平七曜光
下土萬國無戎

歿小臣不用淚滂滂

古劍篇

我有三尺古鐵劍人言本自出昆吾
昆吾之劍可截玉芙蓉湛湛秋濤虛
千年土花不敢蝕武昌赤泥安用拭
錯魚裝匣半欲碎玉具鹿盧猶可識
世間何限不平事便欲攜贈同心子
長蛟顛顛負飲飛怒白虹慘淡荆卿死
我今將此匣中藏不令俗子見光芒
只應寒齋風雨夕時時龍吼殷空牀

燈花謠

艾蒻烟銷繡閣空
牕間爍爍搖殘紅
蘭膏欲盡虹

暈暗狂花幾瓣懸玉虫青蓮聞說火中生金粟何
緣焰裏成秋波貯淚看不足玉釵欲剔還自停蕭
關三載無消息明晨定有簷頭鵲羅幃從此不寒
冷丙夜深深照雙影

送聖節賀使李公春元赴皇都

皇明天祿真無彊 陛下龍飛四紀強年年八月
萬壽節四海玉帛朝明堂我王拱北罄丹誠李
侯將命才且良誦詩三百豈足道特達自是如圭
璋五月火雲天欲燒傳車西出關河長嚴程踏盡
四千里清秋應到金臺徬紫殿晨霞簇仙仗彤庭

瑞靄和天香螭陞嵩呼拜舞歸釣天一夢何微茫
全遼往日纏兵氣虜騎出沒頗猖狂自從熊公開
幕府威聲遙聳左賢王經過不復戒烽烟領取物
色歸詩囊季子觀周動上國長孺入漢光大梁明
公此行誰不羨致身玉京親耿光君不見周南舊
太史十年滯留成老蒼壤虫黃鵠自此隔矯首雲
天神內傷

洗鋤

農家耘事已畢老少男婦聚飲謂之洗鋤
余田居目擊其事而記以詩

田翁白竹笠田婦青布裙烹鉏斫瓜薦鰕魚老瓦
盆盛黍酒渾青莎原頭桑葉陰坐來四座農談喧
東家耘較西家晚低田禾比高田繁少年行酒長
老醉短袖起舞何蹲蹲一年作苦一日歡田家此
夕百憂寬君不見去年吏到索租時翁姥狂奔三
日飢田家樂事豈易得勸君醉飽無遽歸

送別高山督郵金晦而長歌

君不見嶺頭梅北枝未發南枝開縱使榮落各有
時不妨同是風霜姿與君結髮託心交白水青松
誓不移自喜芝蘭同臭味人稱伯仲吹壙簫有口

不欲說往事可憐吾儕逢百羅梁獄曾成鄒子書
楚澤共賦靈均詞謂言波瀾無二源那知萬事多
覆翻乾坤再新日月明品彙同霑雨露恩憐君仍
是向隅人整轡作吏趨風塵長安北去一千里古
驛獨與磨磨隣君家嚴君被恩謫遠作磨天嶺外
客莫恨青衫在泥塗猶堪綵服承晨夕萬死憂虞
鬢已班一生忠孝心如丹傲吏由來踈節目遷客
不曾開心顏勸君努力加餐飯向子讀易知益損
聖主終應登寃屈清流定不忘推挽清陰老子昔
宦遊到處題詩遍驛樓憑君一一細和取大阮小

阮名同留

張元帥出師日 主上親餞于西郊行

前行後行鑣衲襠赤羽白羽光煌煌鹵簿前頭咽
鼓吹 君王親送都元帥借問元帥身姓誰漢代
留侯本多智曾中金版玉帳經要與海內除撓搶
句者遼塞有胡塵榆關以北無堅城三韓健兒豈
不多隴西都尉先投戈督府西巡臨鴨水威聲直
壓單于壘主昏政亂萬事非王翦謝病頻陽歸吾
王英武奮大義 太祖宗祀重光輝逆胡游魂待
天誅吾 王赫怒張威弧銅虎兵符下武臺水犀

十萬隨風雷吉甫文武衆所推分閭救世非公誰
伏波據鞍氣猶壯充國論兵謀更奇壇場禮數久
不行九重有命羣臣驚法駕平朝出西郊鉤陳壁
壘何縱橫黃金鎖甲八尺身路左長揖真將軍千
牛萬壘犒饗遍密授勝筭人莫聞尚方寶刀秋水
寒玉具鹿盧龍雀鏤 君王親下盤龍榻付與將
軍雙手接三軍鼓舞聲動地父老縱觀多感泣千
載恩榮此最厚百年胡運那能久有戈必喋可汗
血有旗必懸名王首遼河碣石漢乾坤紫塞無復
狼烟昏功成奏凱歸金闕然後方酬 聖主恩

贈寫真僧思舜

寺有牧牛派下十六祖師影
子歲久損晦師為新之且欲

為余寫
真云

十六祖師歸西天世人
不識真面目閣黎筆端天
眼通一掃神光滿殿屋
前身定是顧虎頭宿債曾
留尾棺閣他時訪我丈室
來須信青蓮是金粟

哭青興君李重老

銀臺省裏別君時北風慘澹吹旌旗
可憐一去不復還血入馬灘江水殷
男兒腰間三尺水未斬逆豎長已矣
英魂不逐夜燐飛化作青虹射天紫

送李尚輔學士掌試嶺南長句

大嶺以南七十州負山抱海控蠻洲中間一條洛
江流地靈勃勃人材優明珠出胎映天球豫章千
尋竹箭稠德人雖遠舊風留家家弦誦擬魯鄒思
皇多士王所求天網一罩期盡收提綱者誰有
李侯李侯符彩何首首九苞瑞翰翔丹丘文章致
身近宸旒石室金匱紬春秋有時簪筆立螭頭
細梅密勿陳嘉猷掌舉擇士比獮蒐或不得雋君
子羞春風噉命向南陳白袍鵠立筵行騶秦臺
百鍊解觸幽萬象好醜那能度滄溟深處海若愁
珊瑚正待鐵網搜塩車莫遣困騅騶劍氣不復干

斗牛向來萬事良足醜
貢闈都不分薰蕕
中興更化歲再周
士頗作新知自修李
俠衡鑒更無儔
定知逢掖爭歌謳
春明一出便離憂
何況道路阻
且脩蒼蒼雲木
暗龍湫隴水幽咽
無時休停驂
莫上古驛樓
白雲天際長悠悠
公堂唱罷鳴鹿
呦踏
慈亦有明星
眸流黃入夢情
綢繆宦遊雖樂
別腸柔歸來
趁見安石榴
錦囊千首倘見
長為君一一
相和酬

送關東方伯金友古

功名柔一炊
勝敗蝸兩角
不知爭底事
一生長觀

觀長安秋暑金石流袍帽束縛同拘囚坐曹決事
汗如瀉百事無補徒自愁喜君飄然辭直廬按節
關東名勝區騷駢踏遍鳴沙路三桮五芝充行厨
金剛頂上攬八垓海濤直撼毗盧臺回頭下瞰人
間世無限蟻蠊埋黃埃不是君身有仙骨宦遊那
得神仙窟送君不覺心飛揚安得借君霞佩共翔
翺

戲作李承旨病足歌和澤堂韻

君不能橫戈鳴劍西擊賊一盪一決千夫却又不
能青鞋去作五嶽遊獨趁飛猱超絕壑有屨不著

欲尋踊徒然壯氣如山涌河麋微虺古所醜恐被
詩人刺無勇銀臺密邇白獸闥侍臣接武行相戛
威顏咫尺薤簞滑不覺纖紋礙輕機從來螳垤解
躡人駉駉未免霜蹄蹶關情閨閣子豈然達識拚
却申屠刖敦敦獨憑枯梧暝十日不上公車謁吾
觀世路劇崎嶇夷險安危難預圖樂正大儒傷下
堂長孺名公還墮輿須知自有尊足者勃率槃跚
長晏如

送尹巡察仲素按湖南

嘗聞老氏語以正治國竒用兵尹侯於為治竒正

能並行正為政之幹奇則其權衡洽然萬人歡藉
藉騰賢聲漢廷多良吏寬猛各有成子元用武謫
延壽推至誠湖南國根抵民悍而兵勅旬宣用重
人為輟銀臺英閔侯有異政弛張須得平臨分別
有贈孟博志澄清

古意

孔雀被牛觸罪在孔雀不在牛不飲砥柱湍胡為
來近蹄涔遊牛自有角便解觸翠尾金花誰復知
君看鴻鵠在雲際矰弋紛紛安所施

戲作四禽語

鼎小鼎小飯多炊不了今年米貴苦艱食不患
小患無粟但令盎中有餘糧乘熱再炊猶可足
我死也何為者聲聲悽斷叫復止問是怕死還欲
死幽林深樹好栖遲雌雄飲啄飛相隨籠中翡翠
應羨爾爾生可樂何死為
稷粥稷粥米少水多粥難熟前年大水往年旱官
租未輸農夫哭喫粥不飽猶免饑勸君莫厭稷粥
稀

各各和同將相諸公主恩至重私怨輕底事睚眦
長忿爭君不見張公得意李公啼廉蔭高風誰得

齊

和清陰遊清平錄以下續稿

清陰才調懸白日妙筆清詩稱兩絕字如騰蛟闢
蜿蜒詞如彩霞舒遠天慶雲山中叩梵宇一筇踏
遍瓊瑤圃雙碑無字半封苔蒼苔林中花自開不
見當時息菴子留詩寫向巔崖裏古人逝矣無與
伍獨為名山三日住右西川長句韻

鵲卵菴子容蒲團菴外面面山漠漠菴中人去五
百年石上留題字半蝕唯有山前石池水萬古依
然山影落右息菴韻

龍門山僧萬益通脫嗜酒每痛飲舉白輒稱
灑落人以灑落禪師呼之五峯李公有詩遂
次其韻以贈之

酒有何好孟嘉嗜酒有何過淵明止高僧若必破
戒律貞婦還須強倚市我今試問灑落師酒味何
如禪悅味師言天性嗜米汁偶入山門稱衲子不
信醍醐解發性但把餘生付麴蘖一日一斗未云
足却愁青錢欠三百居然頓入不思議三教都忘
儒道釋欲知灑落作何狀煩惱銷融心境廓豁翁
一生不知醉藥叢叢中坐蒿目令人媿殺酒箴語

瓶與鴟夷誰巧拙

柏烏謠送清河宋宰希進

臺中柏根如石春來雨露借恩光歲寒依舊青青
色柏上烏尾畢逋不向秦家桂樹棲飛去飛來朝
復晡臺端御史南遷客清河縣裏雙鳬舄柏葉不
凋烏不去歸來又坐臺中席

古意二首

白鷺自白烏自黑半白半黑枝頭鵲天生萬物賦
形色白黑未可分美惡山鷄文采錦不如照影清
潭或自溺獨憐鷦鷯占一枝逍遙不羨垂天翼

有鳥飛來云是鳳羽毛粲粲巢阿閣桐花竹實豈
不美却向田間啄殘粟野田黃雀何耿耿羣
起爭相嚇含羞欲向阿閣飛昔為鳳凰今鵲

谿谷先生集卷之二十六



天
卷之二

二



谿谷先生集卷之二十七

五言律詩一百五十首

贈別畸庵子

匹馬今朝發秋風昨夜涼
窮途理豈愜貪別恨偏
長棋酒將誰伴歡娛舊未央
好尋鷄黍約休戀稻
魚鄉

贈別尹長步

窮冬北風涼游子在他鄉
鴻鴈依南國龍蛇蟄大
荒風波人事變存沒故情長
千載羊曇恨知君倍
斷腸

幾待南州信誰傳北客書生涯長旅食歲暮未安
居詩律新功細湖山舊約虛一樽容易盡青眼意
何如

舟行

一棹西江發滄波下杳然鴈聲秋色外帆影夕陽
邊破浪心猶壯乘桴事可憐漁翁身世穩蘆岸繫
船眠

清風溪閣次韻

咫尺連闌闌風烟自不通因人地始勝造物意偏
工嶽影當軒外溪雲入戶中秋光更點綴絳菊間

丹楓

清風溪閣次外舅韻

吾舅幽居地清溪瀉洞門種松渾欲老栽竹已生
孫烏几香烟細晴牕曉旭宣窮途聊自適賦與荷
乾坤

哭宋子登

危會偏吾黨南州君又亡可憐心事好常恨別離
長草草人間夢茫茫地下郎平生湖海興從此轉
荒涼

憶昨長安陌衝泥策蹇來駐鞭相問訊分手各遲

迴存沒居然隔孤嫔更可哀素車垂一送南望淚
盈腮

江都拜謁曾祖妣墳塋

再拜瞻塋域東風一瓣香
亂離遭大故墳墓寄他鄉
宿草回春意荒山下夕陽
孱孫情事在此日淚
千行

春遊次韻

窮愁長閉戶忽忽度佳辰
且對眼前酒何慚頭上
巾風烟凝淑景花柳媚殘春
一醉須千日醒來萬
慮新

安山別業屋後有香檀一株乃高祖柳亭
公手植枝幹蒼古鬱然百年物也頃為風雨
所折龍顛虎倒氣象索然傷歎感懷遂成二
律

先祖手自植居然近百年無端成委折不復鎮林
泉杜老江枿歎莊生杜櫟篇元精理難測慘淡舊
風烟

為愛虬龍狀歸田興倍長亭臺生氣色老大飽風
霜已負明堂用偏令志士傷獨留枯朽質灰盡尚
流芳

春日安山別業敬次先祖浩浩亭韻因示張
丈

舊業惟桑梓荒涼數畝陰池臺留物色花竹媚幽
深野饁還堪飽村醪自可斟歸田真得計脫屣認
天心

田家春苦旱海國晚多陰幾處堽烟迥孤村花氣
深有詩聊自詠得酒共君斟京洛多冠蓋何人會
此心

又示張丈

此地成幽筭非君誰與隣漁樵堪作伴酒賦更相

親廢堰蒲芽嫩空簷燕語新諸郎能好事問字不
嫌頻

哭石田成先生四首

愛酒陶彭澤躬耕龐德公至今高士傳誰復古人
風天地窮吾道湖山失此翁醉魂招不得彈指大
千空

此老今難得堂堂湖海豪昏冥聊自適行誼更誰
高懸解元無累浮休任所遭平生得意處痛飲讀
離騷

每惜洲翁沒相逢淚泫腮先生今已矣此道更傷

卷之二十七
四
哉浮世同泡幻高人一往來還疑千日酒爛醉卧
泉臺

去歲揚江別秋天落木時把盃還舊興握手更前
期不復床前拜空留醉後詩春風一掬淚沾灑有
餘悲

逍遙寺

青山上琬琰碧殿煥金銀忽覺塵喧隔因瞻像設
新亂峯當戶闥飛瀑洒衣巾歧路長形役從今結
勝因

山外泉

未到峽中縣却聞山外泉雙崖開翠壁一壑瀉晴
川老樹千章合危巖百丈懸征途聊一憇心賞更
泠然

悄悄

悄悄牕間坐悠悠客裏情峽雲時變態山木晚多
聲處世無長策窮途作遠行那堪歸思切夜夜夢
秦城

紫漿冷麪

已喜高齋敞還驚異味新紫漿霞色映玉粉雪花
勻入箸香生齒添衣冷徹身客愁從此破歸夢不

須頻

雨後出遊示同行

峽中雲雨地晴景亦佳哉草樹幽香發江山濃翠
開石門危棧底崖寺亂峯隈珍重同遊伴相期帶
月迴

芍藥

芍藥翻階上盈盈媚晚晴鳳池才子詠溱水羨人
情落蕊隨風舉殘紅倚日明客中無意緒照眼句
還成

示金櫟翁

他卿聊自適高館有餘清岸幘山風入憑闌林月生羸軀須藥補佳句待君評好鳥知人意殷勤盡白鳴

巖泉寺

絕高迥宜於瞻望

縹緲烟霞外精藍結構牢層崖臨絕壑萬象俯秋毫世界容何物江山屬我曹白雲生脚底始覺致身高

讀表忠錄和宋子真

身許艱危際人猜骯髒姿死綏酬素志請劒駭明時事云功仍著忠成主始知青編一腔血萬古結

長悲

用趙怡叔韻送扶餘趙宰

百戰坤靈死周遭認舊城英雄名獨在興廢恨難
平花落何年盡江流萬古清諸公送仙令多病負
班荆

送金白川之任

海縣饒魚稻風烟近故都青春馳五馬白日看雙
鳧行頌菜蕪甌應還合浦珠離亭欲相送恐被鬼

擲揄

白川故鄉也
得用玉驄也

夜卧聞蛙鳴

閣閣羣蛙沸空齋雨歇時真堪當鼓吹誰復問官
私茂草連深巷漢流溢廢池終宵喧客枕不寐強
吟詩

歇馬

行役疲長路秋炎傲薄陰揚鞭經古驛歇馬傍青
林山響隨樵斧泉聲雜客吟倚鞍成小睡斜日下
西岑

作客

作客豈多日居然羈旅情野橋羸馬過村樹亂蟬
鳴行役思前哲文章仰大名小詩吟未就山際暮

烟平

盡日越長坂羸驂鞭不前途窮難愜意計拙且隨
緣曠野生秋色孤村冷夕烟眼中遊歷地湖甸舊
山川

他鄉

他鄉聊飽飯為客任浮沉縣僻羣山合庭空老樹
深病軀湏藥餌詩卷課晴陰蕭瑟驚秋序絺衣白
露侵

葡萄

客裏葡萄熟南州未見霜種應來大夏品不數西

涼颯颯摩尼瑩津津
瑞露香故園栽滿架
風味更難忘

賦得暝色

日落角聲哀
蒼茫暝色來
乍從深樹起
轉向遠山催
四壁蛩愁叫
千林鳥帶迴
百年長閱此
為客思難裁

即事

野水寒收漲
秋雲晚作陰
故園書未達
歸路夢頻尋
蕭颯憐衰鬢
飛騰負壯心
千秋杜陵老
異代許知音

淹留

晚飯覺身輕
庭除曳屣行
村烟籠樹白
野水轉林清
踈懶嬰時謗
淹留慣物情
今年幸秋熟
農戶飽香秬

有感

白露變清霜
江潭摧衆芳
風塵老騏驥
矰弋到鸞凰
天遠真難問
人微謗自傷
古今無限淚
獨立更沾裳

池亭秋思

秋雨入池塘
北風催早霜
寒蟬藏柳葉
水鳥啄蓮房

房詩罷憑危檻愁來望故鄉
敗荷顚顚色猶帶舊時香

客中邂逅李生德久喜贈一律

異縣親知少逢君為暢然襟期無近俗問學早希賢
野館秋烟入霜林素月懸燈前一夜話聚散各隨緣

山崦人家

山合疑無路溪回忽有村松篁擁茅屋禾黍映柴門
秋日明林杪清霜冷石根即茲堪避世何必問桃源

到西原諸鄉老置酒相要席間醉賦

為愛田家趣渾忘野迢遙寒泉流作澗古柳卧成
橋村釀仍催漉鄰翁不待招飲酣爭席罷秋樹亂
鳴蜩

贈別楊生汝淳

楊子自佳士相逢懽意深葭莩敦舊義蘭臭契新
心野外同樽酒燈前伴苦吟風塵湖海客歲晚別
知音

卧病

久客侵霜露秋來舊疾纏近身惟藥裹遮眼有書

編未撥形骸累長為骨肉憐平生討癖在伏枕課
新篇

寄徐秀夫

南來擬見子世事苦多違笑我淹留久憐君落魄
歸湖城秋鴈迥客館暮螢稀懸榻何時下相思贖
帶圍

徐秀夫來訪既別寄詩

相憶令人瘦相逢喜可知湖山為客地秋日把盃
時意氣惟吾輩風塵又別離玄公儻見問多病強
吟詩

客中聽牙箏

按字書曰唐有軋箏以片竹潤而軋之牙當是軋之訛

秋夜聽鳴箏絲聲如竹聲清催霜葉落怨徹候虫驚法部傳新調天涯動客情曲終人欲散寒月傍

簷明

秋雨

秋雨晚廉纖輕寒侵薄縑應催菊花發故逐暮雲添草泥虫聲苦天長鴈翅沾今宵枕上聽殘滴灑踈簷

待鄭子容

鄭子何時到南征枉驛程高秋夜來雨久客不勝

情多病愁淹泊斯文喪老成

時切聞月汀先生計
僕與鄭生俱是月汀

門人人生足離別一會未應輕

雨晴有懷

漠漠連宵雨朝來霽景清故人期不到秋日恨難
平歸路千山外湖天一鴈聲新詩多苦語認是客
中成

野闊

野闊何時盡秋高客意迷孤鴻入雲沒老馬向風
嘶行役身難健窮通命不齊新詩為遣悶吟罷轉
含悽

月汀先生挽詩三首

一代文章伯三朝老大臣
典刑留琬琰勲業在麒麟
白屋分餘照青雲仰後塵
歸然今已矣雪涕問蒼旻

伯仲稱聯璧雲霄看鴈行
台階推事業山斗擅文章
華夏聲名動耆英禮數光
堂堂五福備不朽更流芳

誨掖勤提耳愚蒙早服膺
推書與玉粲遣騎覓張
憑小子將安放窮途慟轉
仍平生辦香在一點已傳燈

雪後寒甚殘菊猶自可觀感而有詠
萬卉繁仍脆孤芳淡自竒冒霜初吐蕊經雪尚含
姿共託重陽翫因成歲暮期莫嫌憔悴甚偏與主
人宜

次韻答李士謙

愛爾多幽意兼工五字詩比鄰即蘭室羣從摠瓊
枝潦倒慚前輩飛騰讓異時平生百事拙靜默或
能之

來詩有看君
能靜默之語

安陽川上歇馬

澆澆溪聲合臨流稅鞅初枯芻秣疲馬殘飯施游

魚村柳晴仍暗山花暖欲舒浮雲蔽京國回首更
愁余

哭秋浦黃公五首

為外舅楓溪公作

執友今誰在斯人已矣夫世難容此道天酷禍吾
徒鵬鳥妖先兆龍蛇識忽符可憐新雨露猶足潤
黃壚

嚴譴傷心目離亭把臂時神明臨正直生死荷恩
慈宣室仍無召泉臺本不期親朋半零落存者命
如絲

絕域初啣命邊壇未解兵
援文馴海若握節傲長

鯨九死丹衷在千秋白日明方知漢法密不貸一

蘇卿

江榭曾聯榻坡山共束脩
塤簞齊伯仲贈屢慕回
由往事渾如夢餘生等是浮
不知泉壤裏還繼舊
游不

戚矣懷沙賦傷哉殄瘁詩
病因卑濕劇才或急難
思一介難行李三空重度支
白頭無限慟非獨為

吾私

時方擇使日域而經用且竭
不無九原之思故第三聯云

送林東野點馬赴關西

關右擅名勝此行真若仙
烟霞妙香寺歌吹湏江

船樂事無清賞丰姿正妙年誰憐病摩詰文室坐
脩然

江亭晚景

落照映江面微涼生樹間眼中一帆度天際孤雲
閑露頂倚危檻拋書看遠山直須留十日興盡始
應還

泛漢舟中與紫元仲淵天章同賦得蕭字

解纜風初起披襟坐轉遙烟分獨去鳥沙認早歸
潮蛟窟涎仍積烏檣影自搖只愁詩令急吟鬢坐
蕭蕭

又得無字

江漢浮天闊輕舟泛泛孤長風凌汗漫灝氣接虛
無客夢驚孤鶴行厨斫巨鱸平生張翰興直欲向
東吳

泛漲

積雨秋濤漲江源月岳傾海門容不得沙岸浸全
平鷗鳥生涯闊蛟龍氣勢生扁舟好乘興拚却性
命輕

穫稻

白露郊原冷汙邪早稻黃屯雲卷穠穉積水見蒼

茫出碓精如玉翻匙滑更香前溪秋潦盡兼有鱗
啣芒

雨中示鄰人

處世苦獲落歸來滄海頭天低烟浦晚山擁鹵田
秋一雨催寒事孤吟動客愁比鄰足相識差可慰
淹留

蟋蟀次韻

繞屋多衰草終宵蟋蟀聲天機真動聽時物轉關
情淅淅霜威逼看看月魄盈客牕偏側耳愁坐到
天明

次韻示張生

暖日烏皮穩頽然夢自牽身閑病差減思澁句難
圓魚稻饒秋味風烟媚海天何妨蔣詡迕籬落近
相連

鷺江途中雨行

羈旅推前哲無嗟行路難衝泥瘦馬怯冒雨小僮
寒村樹烟中遠江沙望裏寬奚囊仍在背詩好有
誰看

歲暮答畸庵子

千里素書到故人情可知憐君尚流落笑我更羈

離歲盡懷彌惡天長夢亦遲閉門三尺雪腸斷對
瓊枝

別字摩詰戲吟

本自空名相何須較舊新前身定居士餘事作詩
人香火長齋夕吟哦爛醉春故吾元不變隨處揔
天真

苦雨

春雨本催花雨多花事賒淒淒寒氣動稍稍晚風
加陌上停游騎城頭濕暮鴉故園歸未得空憶長
桑麻

風雨

澤國多風雨冥冥苦未休
雲烟迷迥野節序送窮秋
氣閉龍蛇蟄寒靈鴈鴝
愁客居蕭瑟甚空攬木
綿裘

客裏

客裏無懽意燈前只苦吟
三秋風雨夕一片歲寒
心薄俗防機阱窮途愧
陸沈平生好詞賦不解博
黃金

濩落身仍困羈桎迹未安
短衣隨李廣長鋏和馮
驩冷雨經秋歇孤燈入夜
寒親朋各南北詩就共

誰看

桂陽途中

霜飛西候盡澤國氣蕭森鴈起秋田闊鵬盤暮壑
陰樵蘇尋古道烟火傍寒林家在連山外遙瞻雲
際岑

故自羈遊慣仍將寵辱齊路長秋草遍天迥暮山
低暖浦留鴻迹危橋澁馬蹄孤村客歸處日脚赤
雲西

還家

崕出蘇峯外村臨大鹵邊海明含落日山暗逗秋

烟久客無佳况貧家足靜便還憐舊書帙仍傍小
牕前

楊花渡

別浦收寒漲層冰閣晚沙海門天際闊帆影日邊
斜積氣霾江樹長風卷浪花大堤疑上住一半是
漁家

江合波濤壯潮平島嶼浮寒天趁行旅落日待歸
舟雪暗迷深嶽沙長接幸州平生破浪興搔首立
汀洲

刺促

刺促復刺促征夫多苦心野橋欹閣岸村逕細穿
林海氣霍寒日江雲結晚陰匣中孤劍在時復作
龍吟

次韻酬寄金晦汝

難危各南北骨肉迭悲憐我住雲山外君歸瘴海
邊田園無樂土風雪逼寒天相憶川原隔難乘訪
戴船

每作經年別因成避世行夢中迷客路詩裏見君
情兵氣連雲黑妖星照夜明可憐西笑地非復舊
秦京

風雪夜吟

向夕牕扉振寒聲自遠林風雲渾朔氣凝閉豈天
心短褐空齋冷孤燈半壁陰不知門外雪添得幾
分深

雪後次舍弟韻

急雪連昏曉遙山透晦明乾坤初霽色林壑轉寒
聲凍雀翻還墮飢鷺噤不鳴袁安僵卧久乘興也
難行

次韻

不奈玄冥虐仍愁吳二鬢家貧妻只瘦衣弊女長

號積雪籬根短晨曦樹杪高和詩拈惡韻疑坐費
搜牢

烽火 金陵道上作

雪外千峯暝雲間幾點明遙遙自關塞夜夜報秦
城風急偏難定星疎乍欲爭腐儒逢世亂看此寸
心驚

雪中過西鄰醉歸寄謝

濁酒兼清酒君家似我家深盃融雪片好句入燈
花浮世悲歡足窮途意氣加醉歸煩遠送寒月坐
輪斜

送安察訪斗元之任五陵

作吏意何如青春佩綬初官曹似是馬傳舍不歌
魚花雨鳴沙暖金波鑑水虛爾時相憶否休惜八
行書

伏枕

伏枕淹時月將迎俗累輕老仍留法喜閑却進毛
生臘盡餘寒在牕虛返照明平生愛蕭散病裏道
機清

睡

閑與病相適睡將慵有期偏酣晚飯後直到午鷄

時蘂枕涼仍穩
掩笙滑更宜
夢周非我事
那復歎
吾衰

風雨

乾坤積陰氣
風雨振空林
似與蛟龍便
難知真宰
心茅齋渾欲倒
大陸半成沉
獨有寒鷄叫
膠膠不改音

中秋月

今夜中秋月
高開万里雲
遙空添爽氣
列宿掩繁
文蟾兔初誰見
山河乍可分
茅齋看不厭
涼影坐
紛紛

客次示仲淵

悄悄客子恨悠悠難自我雨聲聽不盡寒事坐相催
檝馬飢長卧城鴉暮却迴非君念幽獨誰復寄詩來

雪夜吟成示張生

今年冬暖甚竟月雨濛濛忽作中宵雪仍號大塊
風閉門雙鬢白擁褐一燈紅却憶西齋客幽懷與
我同

南至日作

宿霧靈寒日崇朝鬱不開何知積陰裏忽報一陽

回生意乾坤在窮愁節序催龍蛇莫深蟄地底有
微雷

畸翁自湖中來訪仍有海西之役有詩見贈
次韻以酬

別後三年夢燈前一夕懽浮名揔身外浪迹各雲
端羸疾何時健儒生自古酸憐君又行役歲暮弊
裘寒

天章新入玉堂以詩風之

禁直綾衾暖仙曹玉署妍何堪青吾輩本不要騰
騫萬事名相累孤蹤病自全黃公酒壚在幾日醉

同眠

李巡邊先夫人挽詩

禮得三從備身膺五福并門闌有榮戟兒子作干
城結解同泡幻哀榮盡死生將軍多部曲擁路送
丹旌

雪中見雙鶴徘徊澤畔

慘淡郊原暮蒼茫浦溆寒何來雙白鶴忽下海雲
端雪覆青苔凍風凋玉羽殘崑山與玄圃好去啄
琅玕

雪

夜來三尺雪朝起眩雙眸
麥隴都難辨田家不復
愁白烟拖樹杪黃雀集
簷頭殘臘添蕭瑟空齋攬
弊裘

雪後咏月

片月今宵白千峯暮雪晴
乾坤都瑩澈蟾兔轉分
明泉室潛蛟泣林栖睡鵲驚
挂宮寒透骨嬾獨弄
妻情

天章乘傳過弊廬臨別贈此

飲啄殘生困逢迎好客稀
故人驅使傳乘興到林
扉把酒燈花落論詩雪色飛
別君當歲暮悵悵寸

心違

歲除日行謁 先墓途中作

兀兀鞭羸馬行行越亂岡
海風融淺雪林旭曉輕
霜徂歲那能駐流光本自忙
遙知故松柏寒色待
青陽

安陽道上

荒歲猶春色征途麗景遲
麥深藏雉雉花暖惹遊
絲雨足村渠滿烟生隴樹滋
平生適意事馬上得
新詩

斗尾棧

地坼江門豁天低峽嶂圍喧林靈籟動觸石斷雲
飛危棧臨哀壑層陰送落暉漠源從此去迢遞幾
時歸

贈任茂叔

放逐元吾道文章敢自輕乾坤雙鳥在風雨獨鷄
鳴白屋憐生事青山不世情玄亭雖寂寞問字有
諸生

龍津

古城臨渡口危棧轉山腰嶽勢龍門近江源月峽
遙沙頭駐征馬烟際待歸橈疲薊長歧路那堪雙

鬢凋

溪行

行行不覺賒步步入烟霞曲折水屢渡聯縣山轉
遮馬啣路傍草鳥啼林外花應須早投宿西崦有
人家

送天章赴龍灣迎候尊尚書之行時尚書使
竣且還因聞聖天子萬福首章用以志喜
客自長安到因傳吉語來遼關真氣動折太佞星
迴北極元無改東胡遂可摧野人耕鑿穩何恨在
蒿萊

才子稱家聲
聯翩雙壁明
經春陟謁思
六月度關
行草樹疑衣
彩風雲入筆
精遙知鴨江
上歌吹擁
歸旌

今是齋次韻

幽居何所卜
占斷一區春
花竹連三徑
風烟共四鄰
涼簷眠白日
虛室絕紅塵
客到供蔬糲
田家不諱貧

漠漠溪烟淡
蒼蒼村樹稀
為農爭地力
觀物閤天機
偃仰身堪適
飛騰計已非
應同張仲蔚
秋草掩荆扉

酬天章將向龍灣見寄之作

聞君向西塞幾日到龍灣
妙歲頻乘傳新秋正出關
驛樓淹暮雨官樹對晴山
詩自趨庭得何煩倩我刪

奉送謝恩使李公慶涵赴皇都

玉帛行將命燕臺路幾千
中原多難後下國受恩偏
未答生成澤俄崩覆燾天
只應黃道日依舊羽林懸

稼牧家聲遠名流更老成
趨朝雙鬢白報主寸心明
路出千年柱行穿萬國兵
懸知執玉地無限

抱弓情

小階牧丹

衰疾歡情謝名花照眼奇何嫌衡宇裏獨占艷陽
時日夢薰書帙天香入酒卮今朝忽惆悵風雨半
離披

雨後和張生希稷

默默度朝曛搖搖愁緒紛窮鱗强濡沫挺鹿不成
羣細雨飛斜日輕雷輾薄雲憐君為客久歸夢惱
回文

哭金長湍尚寬

不謂遽如許窮途鬼伯催三年抱荼毒一夢泣瓊
瑰舊業憐懸磬親朋憶把盃倚閭無限淚應復徹
泉臺

我昔纏奇疾公來問弊廬飄零相籍在契闊重欷

歔萬事風波後孤生露電虛柴門他日約不復煮

秋蔬

維曾有寄題公齋舍云他詩會
作柴門客共煮秋畦雨後蔬

天章隨體察幕府路出郡治有詩見寄次韻

以酬

多才良自苦行役問如何政是觀兵日難成載酒
過病從閑後減秋入鬢邊多相憶盈盈恨雙星隔

絳河

贈別趙生錫胤

得爾十日留病夫寬百憂書應與王粲詩不問之
累歲暮摻別袂朔風吹弊裘斯文一線在努力勉
藏修

次韻寄長洲叔

寂寞度朝昏齋居帶病痕聽聞鬪蟻動瘦作老鴟
蹲削迹甘藏用逃空為避喧殷懃謝吾叔臭味本
同源

再用前韻

善病長關戶庭苔沒屐痕途窮無籍在道屈任歲
蹲伏櫪騏驎瘦爭巢鳥雀喧樵花自開落誰肯問
真源

挽張訓導

古人重叙族同姓寘吾門此地開三徑吾家隔一
垣林遊聯杖屨社飲對斝搏俛仰成陳迹餘生只
淚痕

哭尹晦遠

淚落自沾髭聞君長逝時多才妨息偃一病為驅
馳斷斷堅貞操英英短小姿異時人物論中夜足

懷其

故許相國夫人挽詩

相國羣公表夫人八耋尊鸞書拜恩渥象服綯閨
門台拆經三載堂封合九原殘生滯江海無路送
朱幡

哭張扶餘暎

落落張元帥身分玉帳符家聲稱令弟宦績宰名
都泡影斯須盡棠華一半枯傷心馬江水不見下
雙鳧

曉行文義途中

落落疎星沒蒼蒼宿霧迷
聽鷄發古縣策馬渡前
溪醜石危臨岸霜花冷
壓蹊昏昏續殘夢不覺帽
簷低

曉行

逆旅侵晨發穿林細迳斜
暗村遙認樹枯塹窄橫
搓霧漲渾如海霜清不作
華流年看雙鬢行役一
長嗟

金山寺丈六金像燬於倭
焚寺僧將復經始
為成一詩

聞說西方聖金光丈六身
三韓留妙相一炬化兵

塵寶蓋雲空影天花冷自春大千瞻仰地擅施空
何人

別懷玉上人

客路仍嚴命空門不世情翻成桑下戀真作夢
中行四牡凌雲嶠是日將歸孤筇寄化城異時支
許約蓮社莫寒盟

九月晦日金馬郡逆旅作

秋懷自僚慄秋盡更添愁氣候侵衰鬢風霜入弊
裘魂飛象魏闕跡滯馬韓州報國唯方寸平生拙
自謀

甄瑩

百濟中興日甄王躍馬年江山擅形勝戰伐闢機
權運去雄圖盡城留王氣遷神嵩亦消歇成敗兩
茫然

赤裳山城僧院

山中有
實錄問

斗絕烟霞表羣峯勢自朝金城臨鳥道紺磬壓龍
標不怕三災到誰言十地遙更瞻藏秘錄瓊笈閣
層霄

賦得鳴咽水

流水復流水潺潺日夜鳴有何無盡恨長作不平

聲龍外征人怨天涯逐客情那堪枕上聽歸夢轉
難成

次梁子漸韻留別二梁

梁氏名亭子湖南第一州淹留真愜意聚散却生
愁詩律還吾輩才聲各勝流霽巖他日約臨別重
回頭

望海

一碧蒼茫外惟看落照孤青齊杳何許方丈本虛
無鰲背分雲嶠魚睛弄月珠長風如可借破浪在
須臾

行莞島中

地盡溟波外山如蜀道危
深冬多碧樹亭午失陽曦
大壑龍蛇橫窮林虎豹飢
惟應木客在見我獨行時

颯颯聞天籟淙淙響暗泉
深林一線路大木下圓顛
嘯谷多山鬼啼叢或杜鵑
防身有孤劍落日看秋蓮

加里海鎮

漲海波濤積孤城睥睨懸
扶桑帆影外蜃市酒盃前
畫角鳴寒日危旌入暮烟
樓船罷擊擢戌卒月

中眠

呈梧牕公

世事初誰料
茫茫只可悲
幾年曾澤畔
今日又天涯
地盡南溟闊
心懸北極垂
惟應看方藥
不用和陶詩

行色

一夜北風急
山椒殘雪明
人烟村徑僻
虎跡野橋橫
行色看孤劍
流年送半生
寒衣未寄到
遙想老妻情

贈牛山處士安士彥

相憶十年別天涯問索居泉聲遠壑淨燈影小齋
虛報國心腸熱論交鬢髮踈平生抱膝意莫惜著

新書

處士善論兵
余強請著書

松廣寺贈王上人

寺在曹溪山

曹溪一勺水千古設真源空潭印寶月寒影浸山
門僧梵晚林響佛燈深殿昏團焦老衲在對我共

忘言

時前有
印月潭

谿谷先生集卷之二十七





